

E labéts, que calè ha dou nouste die ? Oelha las troéytes qui s'en bienèn arraya-s au miey dou gourg, tout en coudasseyan, bergougnouses, ou se per cas û barbòu e rasabe lou briu, d'û cop de coude e la bouque arpude, qu'amuchaben lou cap lusént ta dehore l'aygue e qu'engouliben la bestiote. Aqiu qu'èren. De darrè ue souque d'arbe que las poudèm espia à lesé. Mes que bau la frute qui pendelouquéye sus la branque ? Que-n éy de l'ausèt qui nou-s pot embarra dens la cuyole ? Lèu que-n èrem fatigats dous yocs de las dounzéles qui, au mendre brut, se tournaben escoune. Adiu pésque ! adichats troéytes passades à la harie e culhebetan dens l'òli bourièn de la padéne ! Quauques arragues que besiadeyaben sus lous bord de l'agau, qu'èren perucades. Ô cerisè qu'auheribe quauques flocs, que-ns y puyèm. Puch, coum calè emplega la younade, que-ns e hiquèm à youga au passèlis, à las peyretes, au coutèt.

Coutèts que-n abèm séngles, més lou dou mé amic qu'ère quauqu'arré de nabèt, munit qui ère d'û tire-boussou, d'ue lime e d'ue petite sarre. E ta que soun lous utis sounque ta s'en serbi ! Tabé, l'aut de bouta-s à coupa las recholes qui bourdeyaben l'agau. You, trop yoén ta coumpréne lou doumau, qu'ou dechabi ha. Lou brangàdye cargat de hoelhùmi que cadè dens l'aygue, e debaran, debaran dinqe au mouli, que hasè endoum, que-s boutabe en pièle, e que barrabe lou passelis. E coum s'en arridèm de la hèyte, b'abèm aqiu lou pay Francés qui, dab ue grane arrame, e sayabe de persegui-ns : « Que-ns e boulét ha nega, si cridabe, quoau éy lou qui a hèyt aquet beroy tribalh ? » S'aboum comes, labets, e ahute ! A you, toutu, la bergougne que-m en arribabe lèu, e de oeyt dies nou-m gausàbi presenta enço dou mé ayòu.